


भदौ ३०या स्वनिगः बन्द



नेपालभाषा संघर्ष समिति



स्वनिगः बन्द कुन्हु निहतय् वीर अस्पताल न्ह्यःने न्ह्याः वयाच्चंगु जुलुस



स्वनिगः बन्दया इवलय् वीर अस्पताल न्ह्यःने टायर च्याकाः विरोध प्वंकाच्चंगु



स्वनिगः बन्द कुन्हुया सिंहदरवारया सुनसान लॅपु



‘स्वनिगः बन्द’ छल्हु न्हयव पिदंगु मशाल जुलुस

सुभाय् !

नेपालभाषा संघर्ष समिति ब' भाषिक अधिकार संयुक्त संघर्ष समितिया
मंकाः इगापय् व थीथी भाषिक संघर्ष समितिया ग्वहाली भूगु १९९९ यलाञ्चः ५
(भरी ३०, २०५६) या "स्वनिगः बन्द" तःजिऊ क्वचाःगु ला जुहे जुल । नाप
थुकि स्वनिगःया ब्याक्क जनताया सहभागितां यांनाः भाषिक अधिकार प्राप्तिया
संघर्षय् थ्व छगू लोमंकेमफेगु न ऐतिहासिक घटना जुयाबिल । थुकथं महत्वपूर्ण
थ्व घटनायात कयाः लिपातकं यथार्थ खँ ल्यनाच्चनेमाः छैगु बाःचायेकाः थुगु
आन्दोलनय् प्रत्यक्ष अवतिकाःगु थीथी थाय्या भाषिक संघर्ष समितितय्पाखें
ह्यब्वःगु प्रातिवेत्तायात छथासं तयाः उकि भाषिक कार्यकर्तापिनि माःगु लिच्चः
दगये थुंकाः उकथहे भिकाः थ्वैत थुगू सफूचिया रुप बीगु कुतः जुयाच्चंगु खता
जुइरु, अझ नं थुकी छुं द्विविद्वं व त्वःफ्यगु दयेफ् । यदि उकथया छुं दुसा
उकियात जिसिगु अज्ञानता जक खः, मेता गुगु नं कारण मखु धकाः थुइकादी
"स्वनिगः बन्द" झी दथुइया भाषिक चेतना न एक्ताया छगू प्रतिक खः । थुगु
सफलताया श्रेयया थुवाः थुकि दुनुगलं निसें ब्वतिकयादीपि छिकेपि सकल
भाषा ह्यःमिपिं खः, थुकिया निंति हानं छक्कः थुगु नेपालभाषा संघर्ष समिति
आभार ज्वंकाच्चनागु जुल ।

कजि

मल्ल के. सुन्दर

नेपालभाषा संघर्ष समिति

स्वनिगः बन्दया मूल्याङ्कन प्रतिवेदन

भाषिक अधिकारया सः न्यथनाः स्वनिगःया ब्यांकं नेवाःत सतक्य कुहाँवसें न्याकूगु संघर्षया छगू तच्चकं च्वन्यागु घटना खः - १९९९ यंलाध्वः ५ (२०५६ भदौ ३०) या “स्वनिगः बन्द” । नेपालभाषा संघर्ष समिति व भाषिक अधिकार संयुक्त संघर्ष समितिया मंकाः इनापय् जूगु धुगु बन्द नेवाःतय्सं न्याकावयाच्वंगु आःतक्कया भाषिक आन्दोलनया इवलय् छगू न्हू पलाः खःसा ध्वयानापनापं नेपाःया मेमेगु उत्पीडित जनजाति भाषाभाषीतय् नितिं ध्व बन्द ज्याइवः छगू न्हापांगु अनुभव खता सकल भाषाभाषीपिनि समर्थन व सहयोगय् सशक्त कथं व्वचागु धुगु बन्द २०४६ सालया जन-आन्दोलन लिपा स्वनिगःदुने दक्कले उप्वंः नागरिकत प्रत्यक्ष सतक्य कुहाँवःगु विरोध प्रदर्शन जुयाबिल । स्वनिगःया थीथी लागाय् स्वनातःगु थीथी भाषिक संघर्ष समितियापाखें थःथःगु लागाय् म्हिताक्यंगु प्रभावकारी नेतृत्वया भूमिका अले स्थानीय जनताया सक्रिय सहभागिता धुगु बन्दया सफलताया मू कारण खः । भाषिक आन्दोलनया इवलय् जूगु धुगु बन्द गुगुं अप्रत्याशित वा हथासं प्वंकूगु लिच्चः मखसं सर्वोच्च अदालतयापाखें नेपालभाषा व मैथिली भाय्या छ्चलाबुलायात कयाः ब्यूगु निषेधात्मक उजनं ब्वलंकूगु जन-असन्तोष व आक्रोशया छगू तच्चःगु जन अभिमत खत ।

सकसिनं स्युगु खँ खः, येँ महानगरपालिकाया २०५४ सावन १० या बोर्ड मुंज्यायापाखें झीगु मांभाय् नेपालभाषायात नं महानगरपालिकाया ज्याखँय् छ्चलाबुलाया भाय्या धकाः आधिकारिक मान्यता ब्यूगुयात कयाः छ्ध्वः साम्प्रदायीक पुचलं

सर्वोच्च अदालतय् ब्यूगु मुद्दाय् २०५४ चैत्र ६ कुन्हु न्यायाधीश हरिश्चन्द्र प्रसाद उपाध्यायया याकःचिया इजलासं थुगु मुद्दाया अन्तिम किनारा मजुतले महानगर पालिकाय् नेपालभाषायात आधिकारिक कथं छ्छलेगु-छ्छयेकेगु ज्यामयायेत व मर्याकेत अन्यायपूर्वक अन्तरिम आदेश बियाःहयेवं नेपालभाषा भाषीतय् पुचलय् उघिमय् छगू तं ब्वलंकाब्युगु खः । गुकिया लिचवलय् उकुन्हुहे सर्वोच्च अदालतया लुखानिसें स्वःस्फूर्त कथं पिदंगु छगू विरोध जुलुस असं दगूबहालय् थ्यंकाः अन छगू मुज्याया रुप काल, नापं उगुहे मुज्याया उजं कथं भाषिक अधिकार संघर्ष समिति (तदर्थ समिति) स्वनाः अदालतयापाखें नेपालभाषाया विरुद्ध जूगु पूर्वाग्रहित अन्तरिम आदेशया विरुद्ध जनताय् चेतना थनेत, जनदवाव ब्वलंकेत सतक संघर्ष न्यायेका नितिं छगू पुचः स्वनेमाःगु वाःचायेकल । थ्वहे इवलय् नेपालभाषाया थीथी खलः पुचःया प्रतिनिधिपिं, साहित्यकारपिं व भाषासेवीपिनि १९९८ चउलागाः ४ (२०५५ बैशाख ३) कुन्हु प्रदीप्त पुस्तकालयस च्वंगु मुज्यां नेपालभाषा संघर्ष समिति स्वनेगु ज्या जुल ।

संघर्ष समिति स्वने धुनेवं थःगु भाला पूर्वकेगु इवलय् भाषा सम्बन्धि थुगु मुद्दायात कयाः यथार्थ खँ जनतायात थुइका बीगु तातुनाः थासं थासय् तःधं - चीधं आमसभा, कोण सभा अले सहलह मुज्या मदीक न्यायेकेगु, सांसदपिन्त, देया मूमू राजनीतिक पार्टीया नेतापिन्त ज्ञापन-पत्र बीगु अले मुद्दाया सम्बन्धय् नेपालभाषा व खँय् भाषा सफूचा पिकयाः न्यंकभन प्रचार प्रसारयायेगु ज्या न्याकल । यल, किपू, ख्वप, थिमि, बुंग, थक्वाः व सक्व लागाय् नं अनया न्यलुवाः नेवाःत जानाः संघर्ष समितित स्वनेगु ज्या थ्वहे इवलय् जुयावन । थुज्वःगु संघर्ष समितितय् ग्वसालय् यँदुनेथें मेमेगु लागाय् नं मदिकक विरोध जुलुस, ब्यानर प्रदर्शन, मशाल जुलुस पिकायेगु ज्या जुल । सर्वोच्च अदालतया १९९९ अनलागाः २ (२०५६ जेठ १८) कुन्हुया उत्प्रेषण आदेशयापाखे नेपालभाषा व मैथिली भाषा स्थानीय निकायदुने आधिकारिक ल्याखं छ्छलेमदु-छ्छयेके मदु धकाः रीट जारी यानाबीवं देया न्यायपालिका प्रति मनूतय् नुगलय् तःधंगु असन्तोष व अनास्था ब्वलंकाबिल । थुकिं भाषिक कार्यकर्तातय् तंग्वारा कायेकल । उघिमय् सर्वोच्च अदालतया निषेधित लागानिसें विरोध जुलुस पिदन । असनय् वयाः

चाहुला: पस:, बंपस: तीकेगु व फुक्क सवारी साधन दिके ब्यूगु ख: । आन्दोलन-
कारीपिनि तच्च:गु जोश व आक्रोशया न्य:ने न्हापा लिपा मेमेगु बन्दया इलय् मजू
कथं चिचिधंगु बंपस: तर्कं गनं त:मदु , अले मोटर साइकल व रिक्सातर्कं लैय् जूगु
मदु । बन्दया इवल्य् निंथाय् प्यथाय् सवारी चालकत व आन्दोलनकारीतय् दथुइ
कचकच जुया: निग: प्यंग: सवारी साधनया न्हायर्कं तज्यात ; गयाव:गु आपालं
मोटर साइकलया ता:चा: स्वहायेकेगु ज्या नं जुल ।

आन्दोलनकारीत विश्वज्योति, जमलयापाखें वया: रानीपुखू कुनं राजदरवारयां
लैपुं थहाँवना: ज्याथाय् जुलुस न्य:कावं वनेवं सुथय् जमलय् प्रहरीया लाठीचार्ज जुल।
निम्हप्यम्हेसित ज्वन , जुलुसयात पन । तर, आन्दोलनकारीतय्सं ज्वपिन्त सात्तुसाला:
प्रहरीयापाखें स्वहायेका हल । अथेहे त्रिपुरेश्वरय् टूलिबसयात पनेत स्वबले उकिदुने
सुपिलाच्वं पिं बन्दुकधारी प्रहरीतयसं अश्रुग्यास कयेका: मनूतयत छ्यायेत स्व:गु जक
मखसैं तुप: धस्वाका: गोलीं समेत कयेकेत स्वयेवं संघर्ष समितिया जिम्मेवार मनूत
न्य:ने वना: जुलुसयात उघिमय् पना: टेकुपाखे न्य:काब्युगुलिं बांमलागु गुगुं घटना
मजुल । मेखे मचलिइ लै दथुइ टायर च्याकेत स्व:बले प्रहरीपाखें जूगु लाठीचार्जय्
आपालं मनू सामान्य कथं घा:पा: जुल । निम्ह प्यम्हेसित ज्वन । थुब्ले कालिमाति जुजु
महेन्द्रया शालीक दुथासंनं अश्रुग्यास त्व:ता हल । जुलुसया दथुइ दुहाँवयाच्वं पिं छध्व:
प्रायोजित मनूतय्सं थासं थासय् प्रदर्शनकारीतय्त उतेजित याका: पस: तछ्छायेगु,
घाराघुस्यायेगु ज्याय् ग्वाकावयाच्वंगु ख:सांनं समितिया दुज:पिं जुलुसया न्य:व न्य:व
च्वना: उज्व:पिं तत्त्वतय्त पनेगु व उकथंया ज्यायाकेमवीगु कुत: मदिवक जुल ।

सुथय् ज्याथां थबहि थहाँ वनाच्वंगु जुलुसया दथुं ब्वाकाह:गु बा.अ. ४०२१
या छग: ट्याक्सी घ्वाना: यंगा:या रामकृष्ण रंजित तच्चकं घा:पा: जुइका:
अस्पताल ब्वाकेमाल । (लिपा वयक:या उपचारया निंतिं फुकथंया आर्थिक
ग्वहालि नेपालभाषा संघर्ष समितिपाखें ल:ल्हायेगु ज्या नं जुल) सुथसिया ज्याइव:
क्वचायेका: छैं वनाच्वंम्ह नेपालभाषा संघर्ष समितिया उब्बेया दुज: व र
।जनीतिक कव:या कजि नविन चित्रकार बागबजारय् चायेका:त:गु छगू पस:
थुवा:नाप कचमच जूगु घटनाय् प्रहरी ज्वना: महेन्द्र प्रहरी क्लबय् कुने यंकल ।

बजा: बन्दयाकेगु ज्या तकनं जुल । लिपा अन छगू आमसभा जूगु खः । अले थ्वकुन्हुनिसें निहनिं धैयें स्वनिगःदुने थीथीकथंया विरोधया ज्याइवःत न्यानावन । गुगु ज्याइवःया मंकाः लिच्वः व विकसित स्वरूप कथं न्यज्यागु ज्याइवः खः १११९ यंलाथ्वः ५ (२०५६ भदौ ३०)या स्वनिगः बन्द । खतुं थुकथं स्वनिगः बन्द थुज्वःगु ज्याइवः ज्वनाः सतक आन्दोलन याये न्यव प्रजातान्त्रिक व सदभावपूर्ण वातावरणय् देदुने व्वलंगु भाषिक समस्या ज्यंकेया निति श्री ५ या सरकारया ध्यान साले कथं नेपालभाषा संघर्ष समितिपाखे १११९ तछलाथ्वः १० (२०५६ असार ९) कुन्हु वर्तमान संविधानय् दयाच्वंगु भाषिक अधिकार सम्बन्धि विभेदपूर्ण प्रावधान संशोधनयायेयां नितिं न्यागू वुंदाया माग सार्वजनिक यानाः लिपा देया भूमू राजनीतिक पार्टीया नेतातय्त लःल्हायेगु ज्या जूगु खः । थ्वहे इवलय् नेपालभाषा संघर्ष समितियात नं दुथ्याकाः भाषिक अधिकार संयुक्त संघर्ष समितियापाखें १११९ दिल्लाथ्वः ७

(२०५६ सावन ३) कुन्हु वंगु छगू प्रतिनिधि मण्डलं प्रधानमन्त्री कृष्णप्रसाद भट्टराई नापलानाः थुगु समस्या ज्यंके कथं नेपाः अधिराज्यया संविधानय् दुगु मर्गाः मचाः भिंकेत माग याःगु खः । तर, थुखेपाखे सरकारं इलय् गुगुं लिच्वः तकं क्यनेत मस्वःबले जनताया अभिमत कायेत व सरकारयात सतकं दवाव बीत स्वनिगः बन्द छगू वाध्य जुया बिल ।

यें

१११९ यंलाथ्व ५ बुधवाः कुन्हु जूगु स्वनिगः बन्दया इवलय् यें देय्दुने बन्दया आन्वानयासें संघर्ष समितिया दुजःपिं व नेपालभाषाया साहित्यकारपिं, भाषिक कार्यकर्तापिं सुथ न्हापां असनय् मुनाः छगू जुलुस पिथन । उगु जुलुस असं, बालकुमारी , केल, भ्याचाद्यः, न्यत, प्याफः, मरु, चिकंमुगः, लगं, गोफः, वंदे, कालिमाति तक वनाः पसः तिकःजूगु खः । अथेहे चाबही, बौद्ध, जोरपाटी लागाय् नेपाल तामाङ्ग घेदुङ्ग व खास्ती नेवाः खलःया मंकाः कुतलं उगु लागा सुथनिसें बन्द जुल । थ्वया लिपा थासं थासं पिदंगु थीथी जुलुस येंदिया मूमू बजाः बाहेक पकनाजः, नयाँबजाः, गल्कोपाखा, कमलपुखू, नक्सा, मैतीदेवी, दिल्ली बजाः, पुतली सतक, त्रिपुरेश्वर , थापाथली थ्यंक बान्हि तक

न्हिनय् बंगलं पिहॉवःगु जुलुस असं, थंहिति, क्षेत्रपाटी, मरु,न्हूसत्तक, लुंहिति, आरणएसि, रत्नपार्क, बागबजाः कमलपुखू, ज्ञानेश्वर, मैतिदेवी जुयाः न्ह्याताच्चवंबले दिल्ली बजाः पाःचा क्वय् थ्यंकाः प्रहरी निखें लाकाः याःगु लाठी चार्जय् आपालं घाःपाः जुल । प्रदर्शनकारी व प्रहरीया दथ्युया छझाःया ल्वापुइ छम्ह प्रहरी नायव उपरीक्षकया मिखा तज्यात । अनंहे मंकाः खलः, येंया नायः पञ्जरत्न तुलाधर मानवअधिकारवादीया कथं जुलुसया निरीक्षण यायांवयाच्चवंबले प्रहरीया लाठीचार्जया विरोधयासैं उकियात पनेत वंबले प्रहरी भ्यानय् स्वथना यंकल । अनंहे भाषा कार्यकर्ता केशव चित्रकारपिन्त लाठीचार्ज यानाः ज्वन । जुलुस अन षलख छ्यालब्याल जूसां पलख लिपा हानं मेकथं जुलुस न्ह्याकाः थाय्मदुइ दवुलिइ वयाः क्वचायेकेगु ज्या जुल ।

नेपाल तामाङ्ग घेदुङ्ग व खास्ती नेवाः पुचःया कुतलय् सुथ न्हपां जेवरपाटीइ मुनाः छगू कोण सभायासैं पिदंगु जुलुसं उगु लागाय् पसः तीइकेगु व बातायात पनेगु ज्या जुल । थ्वहे इवलय् स्वंगः ट्याक्सीया न्हायकं तज्याःगु दथुइ दथुइ प्रदर्शनकारी व प्रहरीया ल्वापु जुयांतु च्वन । अथेहे न्हिनय् हानं पिदंगु जुलुस चुच्चेपाटी तक्क वनाः खास्तीदुने बःचाधंगु सभा जुयाः क्वचाल । स्निगः बन्दया लिच्वलं यानाः थ्वकुन्हु नारायणहिट लायकदुने भुटानी विदेशमन्त्रीया जुजु बीरेन्द्रनापया दर्शन भेटया ज्याइवः जुइमफुत । अथेहे सुथय् पाँचखालय् शाही नेपाली सेनाया छगू औपचारिक ज्याइवलय् ब्वतिकायेत प्रधानमन्त्रीयात मोटर गयाः वनेगु संभावना मदयेवं बाध्य जुयाः हेलिकप्टर गयाः उखेपाखे वनेमाल ।

बन्दया इवलय् येंयदुने जक विश्व किरण शाक्य, ईश्वरलाल श्रेष्ठ, श्यामकाजी श्रेष्ठ, सानु श्रेष्ठ, हरि श्रेष्ठ, सुमन शाही, सानुभाई डंगोल, गणेशप्रसाद श्रेष्ठ, नोर्बु लामा, रामबहादुर खड्का, मुक्तिनाथ फुयाल, कविन्द्र गिरि, अमरनाथ गुप्ता, श्यामबहादुर मगर व मदनगोपाल रजितपिन्त ज्वंगु खः ।

थ्वया न्ह्यव बन्दया प्रचार प्रसारया इवलय् यंलाथ्वः १ (भदौया २५ गते) नेपालभाषा संघर्ष समिति व भाषिक अधिकार संयुक्त संघर्ष समितिया मंकाः ग्वसालय् रिपोर्टरस क्लब, पुतली सतकय् छगू पत्रकार सम्मेलनयासैं बन्दया थीथी ज्याइवःत

पितव्यूग खः । थ्वकुन्हुहे सनिलय् नेपाल मैथिली परिषदया ग्वसालय् तराईबासीतय् छगू जुलुस टेकु दुवातं पिदना थःने क्वःनेया मूमू लागा चाहल । कन्हय् कुन्हु यंलाथ्वः २ (भदौ २६ गते) न्हिनय् नेपालभाषा संघर्ष समितिया ग्वसालय् बसन्तपुरं पिदंगु छगू तःजिगु जुसुसं बन्दया सफलताया इनापयासैं यैं महानगरया मूमू थासय् चाहला क्षेत्रपाटी दबुली छगू बःचाधंगु आमसभा यानाः क्वचायेकल । यंलाथ्वः ३ (भदौ २७ गते) नेपाल तामाङ्ग घेडुङ्ग व खास्ति नेवाः पुचःया मंकाः ग्वसालय् सुथय छगू विरोध जुलुस जोरपाटीनिसें चाबही तक पिदनाः खास्तिदुने बःचाधंगु आमसभा जुयाः क्वचाल । सनिलय् न्हू पुचः, भिन्धः त्वाःया ग्वहालिइ उगुहे त्वालं छगू तःजिगु मशाल जुलुस पिदना कालिमाटि सोल्टी दुवाः थ्यंकाः क्वचायेकल । यंलाथ्वः ४ (भदौ २८ गते) सुथय हाकूग वसः पुनाः थीथी नेवाः बाजंत वेतालं थानाः थाय्मदु त्वालं पिदंगु प्रचारात्मक जुलुस न्योखा, न्यत, भिन्धः, क्वहिति, लगं, भोटेबहाः, तहागल्लि, लुँहिति जुयाः आरणएसी न्यःने थ्यंकाः क्वचाल । उकुन्हुहे सनिलय् थाय्मदु त्वालं पिदंगु प्रचारात्मक रिक्सा जुलुस असं, जमः, कमलपुखू, ज्ञानेश्वर, मैतीदेवी, पुलां वानेश्वर, न्हू वानेश्वर, माइतिघर, त्रिपुरेश्वर, न्हूसतक, वंघः, भ्याचाद्यः आदि थासय् चाहलेगु ज्या जुल । अथेहे यंलाथ्वः ५ (भदौ २९ गते) सनिलय् ओमबहाः, नवहिलदुनें छगू तःधंगु मशाल जुलुस यैया पुलांभन्सा, पाको, न्हू सतक, वंघः, असं, त्यरः चाहलाः थहिति क्वचायेकल ।

यल

भाषिक अधिकार संघर्ष समिति, यलया इनाप कथं यंलाथ्वः ५ (भदौ ३०) बुधवाः कुन्हु सुथ न्हापां समितिया दुजःपिं, भाषिक ज्याय् नुगः क्वसाःपिं नेवाःत व गैरनेवाःत मुनाः पिदंगु छगू जुलुस यल देदुने व पिनेया मूमू लँपु जुयाः चाय्नुय् पुचव्य् थ्यनेवं अन प्रहरी पाःबिकाः चलेयाकातःगु साझा बस खनेवं जुलुसय् ब्वति कयाच्चपिं तंवयेकाः अप्पां कयेकेवं बस गयावःपिं, ड्राइभर, प्रहरी सकलें बिस्युं वन । उघिमय् समितिया जिम्मेवार मनूतय्सं हुलयात प्वचिनाः गाःबहाःपाखे न्याकेत

सफल जूगुलिं अन उज्वःगु गुगुं बांमलागु घटना मजुल । तर, माःवहालं वनाचवंगु जुलुस अनया नेपाल बैक लिमिटेडया ज्याकू न्यःने थ्यनेवं बैकया छम्ह निम्ह कर्मचारीपिन्सं म्हुतुल्हाना हःगुया लिच्वलय् अप्पां कयेकूबले उगु ज्याकूया इयाःया न्यःयायकं तज्यात । थ्वया लिपा दौबहाःपाखे न्यःयावंगु जुलुसं अनया मालपोत कार्यालयत “थौं स्वनिगः बन्द कुन्हु छन्हु ज्याकू बन्द यानाब्बू ” धकाः इनाप यानाच्वचवं आकाझाका वातावरण क्वानावल, अन अप्पा कयेकेगु व ज्याकूदुनेया फाइल व भौं च्वलाबीगु थ्यंजुल । थ्वहे इलय् जुलुलयात मंगलय् यंकाः क्वचायेकेगु ज्या जुल । बन्दया इवल्य यल उप-महानगरपालिकाया वडा ल्याः २० व २१ स लाःगु नःबहाः व श्रीबहालय् लँय् दथुइ लोहं तयाः लँपु पनेगु व छक्कः पतिकं प्रहरीत वयाः अनं लोहं लहयायंकेगु याःसां लिपा अन लँ दथुइ मिच्याकाबीवं प्रमुख जिल्ला अधिकारी व प्रहरीया तक्रं सवारी साधन तक्रकनं अनं हयेगु आँट यायेमफुत । सातदोबाटोय् धाःसा प्रदर्शनकारी व प्रहरीनापया ल्वापुइ तःम्ह प्रहरी जवान घाःपाः जुल । अन प्रहरी ज्वनेधुकूपिं मनूतय् त नं प्रदर्शनकारीतय् हुलं स्वहायेका हयेत सफल जुल ।

थ्व कुन्हु निहन्य् छताः इलय् हानं इखालखु त्वालं पिदंगु तःजिगु जुलुसं यल देया मूमू लाग्ना चाहिले धुंकाः नःबहिलि वयाः आमसभा यान्नाः क्वचाल । तर, जुलुस क्वचायेकाः छैय् छैय् लिहाँवनाच्वंभिं भाषिक कार्यकर्तातय् जिल्ला प्रशासनया उजनं छुं छुं म्वायेक ज्वनेगु यात । थ्व इवल्य थःगु छैया क्वसं च्वनाच्वंम्ह छुं मस्यूमह मचा तक्रं मधाल , अले बासः न्याःवयाच्वंम्ह मनू नं मधाल , धवदुक्कसित लाक्वापाक्क ज्वन । थये ज्वंभिं मनूतय् थ्यंमथ्यं ल्याः ५३ म्ह दु । गुकि मध्ये गुलिसित ज्वनाः पलख लिपाहे त्वःताहल , गुलिसित चच्छि थानाय् कुनाः तच्चकं सास्ना बियाः , मां दिक्क म्हुतुल्हानाः त्वताहल । गुलिखेसित निन्हु प्यन्हु लिपा तिनि त्वःतल । ज्वंभिं मध्ये प्रेम महर्जन(आकाश), ईश्वर माली, आनन्द माली, गंगाराम स्याङ्गताङ्ग व राजकुमार कार्कीपिन्त धाःसा जिल्ला प्रशासनं ५०००÷- तका दां म्हतिं धरौटी तया जक्र त्वःतेगु ज्या जुल ।

स्वनिगः बन्द ताःलाकेगु तातुनाः छन्हु न्यःयव अथे धैगु यंलाध्वः५ (भदौ२९) मंगलवाः सनिलय् ६ ताः इलय् यल ध्वाखां पिदंगु छगू तःजिगु मशाल जुलुस स्वनिगः बन्दया प्रचारयासै त्वाःत्वाः पतिकं चाहुलाः पुच्वःया दुवाःतय् क्वचायेकेगु ज्या जुल

। मशाल जुलुस व्वचायेका: छध्व: भाषिक कार्यकर्तातय् पुच: अन लिकसं हरिहर भवनसं च्वंगु साझा यातायातया ज्याकुथिइ वना: कन्हय् वन्द कुन्हुयात बस चलेमयायेत इनाप या: वंबले प्रहरीनाप छझा: हालेमाला: वातावरण अतिकं तनावपूर्ण अवस्थाय् थ्यन । मेखे सातदोवाटया लागाय् नेपाल ताम्राङ्ग घेदुङ्गा ग्वसालय् थ्व कुन्हु सनिलय् जुलुस पिकया: स्वनिग: या वन्द तालेकत इनाप यायेगु ज्या जुल ।

१११९ अनलागा: २ (२०५६ जेठ १८) कुन्हु सर्वोच्च अदालतं नेपालभाषा व मेथिली भाय्या विरुद्ध निर्णय न्यंकेवं तंचा: पिं यल हौग: या छध्व: भाषीक कार्यकर्तापिन्सं सम्बन्धित न्यायाधीशपिं निम्हेसिया कतांमरि ज्याना: उमित दुवा: तय् यख्खाना: आक्रोश प्वकेगु शुरु जुइवं नेपालभाषा मंका: खल:, यलया कुतलय् १११९ अनलागा: ६ (२०५६ जेठ २२) कुन्हु धीधी खल: पुच: या प्रतिनिधिपिं दुध्या: मु भाषिक अधिकार संघर्ष समिति नीस्वनेगु ज्या जुगु ख: । थ्वया लिपा अनलागा: ११ (जेठ २७) कुन्हु सौग: दवुलिं न्ह्या: गु आमसभा, कोणसभाया ज्याइव: मदिक यलया थासं थासय् जुला अथेहे त:गु सहलह मुंज्या व गोष्ठी जुल । यल संघर्ष समितिया ग्वसालय् अनलागा: १३ (जेठ २९) पिदंगु जुलुस तच्चकं लोसंकेमफै कथंया जुयाविल । यल ध्वाखां थुगु जुलुस शुरु जुइत्ययेका तच्चकं वावलं नं थुकि ब्वतिकायेत व: पिं यलया जक मखु यैं, ख्वप, धिमि, किपू आदि लागया मनूत थ्यंकवयेगुलि छतिं पा: मजु । दलंद: या ल्याखय् पिदंगु थुगु जुलुस यलया मूमू थाय् चाहुले धुंका: मंग: लाय्कू न्ह्य: ने आमसभा जुया: व्वचाल । स्वनिग: बन्दया प्रचारया तातुना: पोष्टर तिक: जूपिन्तं यलया थतित्वालय् थ्यंका: प्रहरीतय्सं “माओवादी” या आरोपय् ज्वनेगु व कुंकेगु धका: ख्याच्व: विया: पनेत स्वसां मा: सा ल्हा: वाना: ल्वायेमा: सां ल्वाये धका: तयार जुइवं आन्दोलनकारीतय् जोश खंबले प्रहरीत थ: थम्हं चिलावनेमाल ।

थुगु समिति न्ह्यलुया: “भाषिक आन्दोलन ग्वहालि मचा पुच:” म्वनेधुनेवं थ्वहे मचा पुच: यापाखें लैय् लैय् वना: हापं म्हेयेगु व दिल्लीगा: ११ (श्रावण २२) कुन्हु झिन्त्यादै व्वय्यापिं मस्तय्सं जक ब्वतिका: गु त: जिगु जुलुस यलध्वाखां पिदना: यलदे चाहुलेगु यात । अथेहे अनलागा: ७ (जेठ २३) कुन्हु भाषिक अधिकार संयुक्त संघर्ष समितिया ग्वसालय् यैं न्हूसतकय् जुगु ब्यानर प्रदर्शन ब्वतिकायेत यलनिसें पिदंगु तच्चकं सशक्तगु जुलुसनं उलिहे लुमंकेबह: खत । थ्वहे जुलुसं याना: न्हूसतकया

ट्राफिक टाईतक थप्प जुल । लिपा प्रहरी व प्रदर्शनकारी निश्चलं उतेजित जुयाः अन छझाः म्हुतेवानाः ल्वापु जुल । लिपा नेतृत्वय् च्वंपिन्सं स्थितिंयात थुइकाः न्हूसतकय जःखः दनाः ब्यानर प्रदर्शनयायेगु अक उकुन्या ज्याइवः खःसानं यलं थ्यंकःवःगु थुगु जुलुसया जोश व सहभागिताया स्थितिंयानाः लिपा उगु ज्याइवः जुलुस कथं न्याकाः वातावरणयात प्वचिगु स्वल ।

थिमि मध्यपुर

स्वनिगः बन्दया न्हि यंलाध्वः ५ कुन्हु नेपालभाषा संघर्ष समित थिमि मध्यपुर या ग्वसालय् थिमिया न्हूलँय् अनया जनतात स्वःस्फूर्तरूपं सुथनिसें कुहाँवल । नेपालभाषा संघर्ष समिति, थिमि मध्यपुरया ग्वसालय् द्वलंद्वः मनूया जुलुस पिदन । जुलुस अरनिको राजमार्गाया फुक्क सवारी साधन दिकाः पसः, कलकारखाना व विद्यालय तिकेगु ज्यायायां न्याज्यात । थ्वहे इवलय् राष्ट्रिय क्षयरोग केन्द्र थ्यंकाः अन वयाच्वंगु छगः ट्रलि बसयात पनेत स्वबले प्रहरी निगू राउण्ड गोलि फसय् कयेकल । अतिकं तनावपूर्ण स्थिति ब्वलनेवं प्रदर्शनकारीत व प्रहरीया दथुइ तावायेत ल्वापु जुल । ल्वापुया दथुइ दथुइ प्रहरी तक्वः कथिं मुइकेगु ज्या यायेवं कथिं कयाः अन झिगुम्ह भाषिक कार्यकर्तापिं घाःपाः जुल । तःम्हेसित प्रहरी ज्वंगु खःसां आन्दोलनकारीतय् एकता व साहशया कारणं सकसितं प्रहरीया ल्हातं स्वहायेका हल ।

स्वनिगः बन्दया तयारी कथं यंलाध्वः ४ कुन्हु सनिलय् बोडेया लाछिं छगू तःजिगु मसाल जुलुस पिदनाः नगदे चाहुला थिमि चपाच्वः, बालकुमारी, न्हूलँ व हनुमन्ते तापु तक थ्यंकाः क्वचाःगु खः । अथेहे यंलाध्वः १ कुन्हु थिमिया गुंगः चिभालय् व यंलाध्वः २ कुन्हु नगदेसय् प्रचार प्रसारया ज्याइवः न्यात ।

ने.सं १९९८ कौलाध्वः ७ (असोज १२, २०५५) कुन्हु नेपालभाषा संघर्ष समिति, थिमि मध्यपुर स्वने धुंकाः थिमि जक मखु नगदे, बोडेतक तःगु सहलह मुंज्या व अन्तरक्रिया जुल । अदालतया निर्णय वयेधुंकाः १९९९ तछलाध्वः ७ (असार ६, २०५६) आदर्श माध्यमिक विद्यालयया लागादुने छगू तःजिगु अन्तरक्रियाया ज्याइवः

जूगु खः । अथेहे अदालतया निर्णयया विरुद्ध १९९९ दिल्लाध्वः ५ (सावन १, २०५६)
कुन्हु संघर्ष समिति, थिमि मध्यपुरया र्वसालय् थिमि न्हूलपुं पिदंगु थीथी खलः
पुचःया तःजिगु विरोध जुलुस बोडेतक थ्यंकाः क्वचायेकल ।

खप

स्वनिगः बन्दया ज्याइवः तालाकेगु इवलय् यंलाध्वः ५ कुन्हु नेपालभाषासंघर्ष
समिति, खपया र्वसालय् सुथंनिसें खप च्यामसिंह त्वालय् बःचाधंगु छगू कोण
सभायासें अनंनिसें तःजिगु जुसुल पिदन । खपया मूमू लागा दत्तात्रयी, सुकुलधवाखा,
रवःमरि, क्वाःछैं , तःमरि, नासमना, भार्वाच्वः, इनागाः, इताछैं, लाय्कू, चोछैं,
भोलाछैं,, महालक्ष्मी, जगार्ति , सूर्यविनायकतक नारा हालाः मदिकक न्यानाच्वंगु
जुलुसया दथुइ छगः टाटा मोवाइलय् दुर लहया हःगुयात पनेत स्वःबले मोटरया
न्हाय्कं तःज्यात । लिपा जुलुसयात कःघानाः न्यःने यंकेवं सूर्यविनायक टूलिबस
पार्कय् छगू आमसभा जुयाः क्वचाल । अथेहे सल्लाघारीपाखे वनाच्वंबले ध्वदुगु
छगःशाही नेपाली सेनाया मोटर पनेत स्वयेवं उकी च्वनावःपिं सैनिकतय्सं तुपतं
कयेकेत तकं स्वःगु खः । न्हिनय् हानं दत्तात्रय त्वालं न्यागु जुलुस खपया त्वालं त्वाः
चाहुलाः लँय् ध्वदुक्व मोटर पनेगु ज्या जूबले निगः प्यंगः मिनिबसया न्हाय्कं तज्यात,
मेखे हेपेयानाः लँय् ब्वाकाहयाच्वंगु आपालं टेम्पो व ट्याक्सीया ताःचाः स्वाहायेकगु
नं उतिकं जुल । लिपा जुलुस हानं दत्तात्रय थ्यंकाः क्वचाल ।

स्वनिगः बन्दया प्रचार प्रसारया इवलय् यंलाध्वः ५ मंगलवाः कुन्हु सनिलय्
खपया च्यामसिंह त्वालय् मुनाः छगू मशाल जुलुस पिदन । उगु जुलुस इनागाः
(दूधपाटी) थ्यंकाः क्वचाःगु खः । १९९९ दिल्लागाः ७ (२०५६ श्रावण १८) कुन्हु
हाकूगु न्हि हनेकथं दत्तात्रय त्वालं पिदंगु विरोध जुलुस खपदे चाहुलाः दत्तात्रय
लिथ्यंकाः तःजिगु आमसभा जूगु खः । ध्वया न्ययव ४ दिल्लाध्व (असार ३२) कुन्हु
खपया अरनिको सभा भवनय् संघर्ष समितिया र्वसालय् छगू विशेष अन्तरक्रिया
ज्याइवः जुल । अथेहे १३ अनलागाः (जेठ २९) कुन्हु खप दत्तात्रयं जुलुस पिदना दे

चाहुले धुंका: अनंतुं थ्यंका: आमसभा नं जूगु ख: ।

नेपालभाषा संघर्ष समिति, ख्वप स्वने धुंका: मदिक थसं थसय्
कोण सभा व प्रचारात्मक साँस्कृति ब्वज्या त:गु जुल ।

किपू-पांगा-नगां

स्वनिग: बन्दया इवल्य किपू-पांगा-नगाम्य नं तप्यंक लिच्च: लात ।
संयुक्त भाषा संघर्ष समिति किपुया ग्वसाल्य थुगु स्वनिग: बन्दयात ता:लाकेगु
तातुना: यानाव:गु आपालं प्रचारात्मक व चेतनामूलक ज्यायापाखें गाक्कं तिब:
जुल । सुथनिसें थुगु लागाय् गुगुं सवारी साधन लँय् जूगु खने मन्त । पस:त
कुंकुलाम्य तक गनं मचा: । थ्वया छन्हु न्यव यंलाथ्व: ५ मंगलवा: (भदौ २९)
सनिल्य थुगु समितिया ग्वसाल्य पिदंगु त:जिगु मशाल जुलुसं प्यखें बांलागु प्रभाव
लाकल । थुगु लागाया थीथी भाषिक खल:, सामाजिक संस्था अले राजनीतिक
पाटीया मनूतय्सं ब्वतिका:गु उगु मशाल जुलुस किपूया क्वाच्चं पिदना पांगाया
लाछितक थ्यंका: क्वचाल ।

स्वनिग: बन्दया प्रचार व जनमत क्वातुके कथं थुगु समितियापाखें १११९
गुंलाथ्व: ९ (५ भदौ २०५६) किपूया चिलंच्व बिहारय् छगू त:जिगु नेवा: मुनाया
ग्वसा: ग्व:गु ख: । नेवा: मुनाय् उगु लागाया आपालं मनूतय्सं ब्वति कया:
भाषिक आन्दोलनय् थ:गु प्रतिबद्धता क्यन । थथेहे भाषिक चेतना थनेगु तातुना:
थुगु समितियापाखें त्रिविविया अडिटोरियमस् दिल्लीगा: ३० (श्रावण २६) कुन्हु
साँस्कृतिक ब्वज्या नं या:गु ख: । मेखे, थ्व समितियापाखें तछ्लागा: ९ (असार २३)
कुन्हु किपू बजारय् हापं म्हयेत स्व:बले प्रहरी गैरकानूनी कथं हस्तक्षेपयायेवं निगू
पक्षया दथुइ ब्वलंगु ल्वापुइ समितिया दुज:पिन्त प्रहरी तुप:या चूं दायेगु व
ज्वना: थानाय् यंकेगु तकं यात । भाषिक कार्यकर्तापिं सुरन्द्र मानन्धर, सुरेन्द्र
महर्जन, अशोक भन्सारी व राजेन्द्र खडगीपिन्सं प्रहरीया बांमलाक कसा नयेमाला
“चव्यया उजं मडु” धका: अन हापंतकं म्हयेके मबिल । नापं थ्व ज्याइवल्य

व्वतिकाःपिं आपालं बुद्धिजीवीपिं, भाषिक कार्यकर्तापिं व संघर्ष समितिया दुजःपिन्त ज्वनाः छझाः थानाय् कुनेमु तकं याःगुःखः । तरं, किपूया थुगु समितिया दुजःपिं भतिवाहे लिमच्यूसें ध्वया कन्हय् तछलागाः १० कुन्हु छन्हु न्ह्यव गन थाय् थ्यंकाः. प्रहरीया हस्तक्षेप जूगु खः अनंनिसें हापं म्हेयेमु ज्या न्ह्याकल । थुकि भाषिक अधिकार संयुक्त संघर्ष समिति व नेपालभाषा संघर्ष समिति, यैया कजिपिन्सनं व्वतिकया बिल । ध्वयानाप नापं थुगु भाषिक आन्दोलनया इवलय् थुगु समितिपाखें सहलह, कोण सभा, आमसभाया नं उतिकं ग्वसाः ग्वयेगु ज्या जुल ।

थक्वाः

स्वनिगः बन्दया नितिं खास यानाः स्वनिगलं पिने वनिगु व पिने थन वइगु मूलुखार्थे जुयाच्चंगु थक्वाःया भूमिका अतिकं महत्वपूर्ण जुयाबिल । थनहे जुयाः आपालं सवारी साधनत स्वनिगःदुने दुतपित जुइमागुलिं थुमु लगाया नेवाः जनतातय्सं छप्पं छ्छी जुयाः म्हिताक्यंगु भूमिका तच्चकं प्रभावकारी जुल । ध्वकुन्हु सुथय् ५ ताः इलंनिसें थक्वाःया मनूत मूलैपुइ वयाः बजाःया पसः तिकेगु व सवारी साधन पनेगु याःजुल । सुथंनिसें लैय् लैय् टायर च्याकाः लैपु पनेगु शुरु जुल । प्रहरीत वयाः पनेत स्वःसां थक्वाःया जनता छितिं लिमच्यू । अले जनतातसें गंक गंकन धेत्ताहे जुयाः सवारी न्ह्याकेत स्वःपिनि न्हाय्कं तछथायेगुनिसें मेमे कथंया तोडफोडया घटना निथाय् प्यथाय् जुल । थुज्वःबले प्रहरी-प्रदर्शनकारी जनताया दथुइ तक्वः तःथाय् ल्वापु जुल । लिपा अझ उप्वः प्रहरीत थ्यंकाःवयेवं प्रहरीतय्सं आन्दोलन- कारीतय्त लिप्तुलिनाः दायेगु यानाहल , थुलि जुइ धुंकाःनं थक्वाःया जनता छतिहे लिमच्युगु खनाः वैय्चाःपिं प्रहरीतय्सं लैय् सु सु खन उमित निर्भमतापूर्वकं दायेगु यात, मनूत धमाधम ज्वनेगुनं जुल । छैय् छैय् थहाँवनाः पत्रिका ब्वनाच्वपिं, थःगु ज्याकुथिइ च्वनाः ज्या यानाच्वपिं सु नेवाः, सु गैरनेवाः नापलाक्वसित ज्वन । थक्वाःया भाजुपिं दिनेश महर्जन, सुरेश गौतम, अशोक गोपाली, श्यामकाजी श्रेष्ठ, पशुपति गोपाली, विकास श्रेष्ठ व ईश्वर श्रेष्ठयात ज्वनाः कुन । ईश्वर श्रेष्ठयात धाःसा छन्हु निन्हु जक कुनाः लिपा

त्वःतल । ल्यं मेपिं सकसितं सार्वजनिक अपराधया मखुगु मुद्दाय् तक्यंकाबिल ।

नेपालभाषा संघर्ष समिति, थक्वा: १११९ गुंलागा: ३० (२०५६ भदौ २४) कुन्हु स्वनेगु ज्या जुइ धुनेवंहे उकुन्हुहे दक्षिण पश्चिम लागाया महादेवस्थान, किपुल्चा, बलम्बु, बसिगां, सतुंगः, नैकापतक वन्ना: स्वनिगः बन्द तांलाकेया नितिं इनापयायेगु ज्या जुल । उकुन्हुहे सनिलय् थक्वा:दे छगूलिं नाय्खिं थाना: स्वनिगः बन्दया सुचं च्वयेकेगु ज्या क्वचायेकल । कन्हय् यंलाथ्व: १ (भदौ २५) कुन्हु थक्वा:या महालक्ष्मी देगः न्यःनेया लाछिइ जूगु ऐतिहासिक आमसभाया ग्वसालं स्वनिगः बन्दया क्वातुगु प्रचारयायेत जक तिबः ब्यूगु मखसें उकिंयाभा: उगु लागाया नेवा:तय् नुगलय् जातिय चेतनायात जुरुजारं थनेगु ज्या यानाबिल । स्वनिगः बन्द कुन्हु थनया छैँखा छैँखा पतिकं सकल राजनीतिक पार्टीया समर्थकपिं “झी नेवा:” धैगु भावना ज्वना: मंका: कथं गुकथं कुहाँ वल उकिंया नितिं मनूतय्त ग्वाकेगु व क्वाकेगु ज्या वास्तवय् थ्वहे आमसभा या:गु खः । बन्दया छन्हु न्यव सनिलय् स्वनिगः बन्द सफलयायेगु इनापयासें थक्वाथय् छगू मशाल जुलुस नं पिदन ।

स्वनिगः बन्द धुंका:

नेपालभाषा संघर्ष समिति व भाषिक अधिकार संयुक्त संघर्ष समितिया मंका: इनापय् जूगु १११९ यंलाथ्व: ५ (२०५६ भदौ ३०) या स्वनिगः बन्दया ज्याइबलय् स्वनिगःया सकल जनता सतकय् कुँहोवया: सक्रिय ब्वति कयब्यूगुलिं याना: थुगु ज्याइव: बिचा:या:सिबे तःजिक क्वचाल । थीथी खलः,पुचः,भाषिक व जातिय संघ-संस्थाया ज्वःमदुगु सहभागिता अले राजनीतिक आस्थायात छुवे तया: सकले छप्पं जुधा: न्यःकागू थुगु संघर्ष नेवा:तय् एकताया छगू दसु जुयाबिल । संघर्षय् कुँहोवःपिं कार्यकर्तातय् तं व उत्साह तच्चःसां स्वनिगः बन्द कुन्हु न्निथाय् प्यथाय् जूगु सामान्य ल्बापु व तोडफोड त्वःता अतिकं शान्तिपूर्वक क्वचाल । अथेखःसां प्रहरीया अनावश्यक हस्तक्षेपं याना: थक्वाथय्, येँ दिल्लीबजाः, थिमि न्हूल्य् भाषिक कार्यकर्तातय्सं मा:सां म्वा:सां प्रहरीया सास्ना नयेमाल ।

दक्कले दुःखया खँ, संविधानं बियातःगु अधिकारया दुनेचवनाः शान्तिपूर्ण रुपं याःगु विरोध प्रदर्शनय् ब्वतिकाःपिन्त प्रहरी व प्रशासनं थासं थासय् आपालं मनूतय्त ज्वनाः कुनेगु यात । ज्वनेगु इवलय् थक्वाथय् मनूतय्त तुलुयाः, दायाः यंकेगु, छैय् छैय् थहाँ वनाः क्वथाय् च्वनाच्वपिन्त गःपः ज्वनाहयेगु ज्या प्रहरीयापाखें जुल । अथेहे यलय् नं पसः वयाच्वपिन्त, थःगु छैया लुखाय् दनाच्वपिन्त जवरजस्ती ज्वनेगु यात । यैया दिल्ली बजारय् प्रहरी हस्तक्षेप पनेत मानवअधिकार वादी निरीक्षकया ल्याखं बंम्ह पञ्चरत्न तुलाधरयात तकनं प्रहरी मत्वतल । यैय् झिंछुम्ह, थक्वाथं न्हयम्ह व यलं दक्कले उप्वः न्ययेस्वम्ह प्रहरी ज्वन । ज्वपिं मध्ये यैय् संघर्ष समितिया तात्कालिन राजनीतिक कवः कजि नविन चित्रकार, ज्ञानु श्रेष्ठ व केशवमान चित्रकारयात सार्वजनिक अपराध ऐन अन्तर्गतया मुद्दाय् तक्यंकल । अथेहे थक्वाःया खुम्ह, यलया न्हयम्हेसित नं थ्वहे अभियोग्य प्रहरी मुद्दा बिल । यलय् ज्वपिं मध्ये उप्वःसित थानाय् दुने तच्चकं सास्ना बीगु, “नेवाःतय् राज्य धस्वाकेत स्वःपिं” धैगु आरोप बियाः मांदिक्व म्हुतुल्हायेगु अमानवीय ज्या प्रहरीयापाखें जुल । ज्वपिन्त जाउलाख्यःया डियसपी ज्यासलय् दुनेतयाः त्रुतिंहे हे चुइ मफयेक, तप्यंक धस्वामफयेक कसाबीगु यात । तर, उप्वःसित छन्हु, निन्हु पाकाः निम्ह प्यम्ह, निम्ह प्यम्ह यानाः त्वःताहल । अनं मुक्क न्हयम्हेसित जक सार्वजनिक अपराधया मुद्दा बीगु जुल ।

स्वनिगः बन्दया ज्याइवलय् ज्वपिं भाषिक कार्यकर्तापिं क्रन्हय् कुन्हु सुथय् तकनं त्वःता महयेवं उपिं गन कुनातःगु दु धकाः नापलाःवनेगु ज्या जुल । तर, “चव्या उजं म्दु” धकाः सुयातं नापलाके मब्बू अथेसां कुनातःपिनि नितिं नयेत्वनेया नितिं माःगु बन्दोवस्त समितियापाखें उघिमय् यात । अले, प्रहरी हिरासतय् कुनातःपिन्त अन्यायपूर्वक सास्नायाःगुयात कयाः माःथासय् वनाः सःतयेगु, उकियात दिकेत दवाव बीगु ज्या जुल । समितियापाखें तात्कालिन स्थानीय विकास मन्त्री प्रकाशमान सिंह व गृह मन्त्री पूर्णबहादुर खडकानाप माःगु स्वापूतयाः ज्वनातःपिं सकलें त्वःतकेगु पलाः न्याकल । तर, अथे खःसा नं ज्वपिन्त त्वःतेगु धाःसा मजू । सरकारयापाखें थुखेपाखे सकारात्मक लिच्वः मक्यंगु वाःचायेकाः १११९ यंलाध्वः ९ (२०५६ असोज २) कुन्हु वसन्तपुरं तःजिगु विरोध जुलुस

पिकायेगु व माःसा सार्क खेलकूद जुइगु इलय हानं स्वनिगः बन्दयायेगु तातुनाः उकथंया ज्याइवः प्रचारय् वयाच्चवंबले नेपाल कम्यूनिष्ट पार्टी एमालेया केन्द्रीय दुजः कृष्णगोपाल श्रेष्ठया विशेष कुतलं अथेहे यें क्षेत्र नं-७ या नेपाली काँग्रेसया सांसद तीर्थराम डंगोलया ग्वहाली यंलाथ्वः ९ कुन्हु आइतवाः सरकारी ज्यासः मचाःसां गृहमन्त्री पूर्णबहादुर खडकाया सचिवालयस नेपालभाषा संघर्ष समितिया कजि व दुजःपिं अथेहे भाषिक अधिकार संयुक्त संघर्ष समितिया कजिपाखें मंकाः कथं नापलानाः ज्वनातःपिन्त उघिमय् त्वःतेगु व उमित बीत्यंगु मुद्दा लितकायेत सःतयेगु जुल । गृह सचिव पद्म प्रसाद पोखरेल, प्रहरी महानिरीक्षक अच्युतकृष्ण खरेल व प्रहरी नायव महानिरीक्षक कृष्णमोहन श्रेष्ठपिनाप दुगु उगु खँलाबल्हाय् समितियापाखें आः थयें गुगुं सतक आन्दोलनया ज्याइवः मयायेगु व सरकारयापाखें ज्वनातःपिन्त त्वःतेगु बचं गृहमन्त्रीजुं बियादिल । थ्वहे सहमति कथं समितिं थःगु विरोध जुलुसया ज्याइवः दिकल । थुलिया दुने यंलाथ्वः ११ (असोज ४) कुन्हु येंय् ज्वनाः कुनातःपिन्त त्वःताहला मेखे यलय् ज्वंपिं मध्ये गुलिखे भाषिक कार्यकर्तापिं धाःसा अझं कुनातःगु दनिगुलिं उकुन्हुहे समितिया दुजःपिं यल जिल्ला प्रशासक, यल जिल्ला प्रहरी नायव परीक्षक व सरकारी अधिवक्तापिन्त नापलानाः माःगु कानूनी भ्वं तयार यायेगु दवाव बीवं थ्वया कन्हय् यंलाथ्व १२ कुन्हु यलया ल्यंदुपिन्त नं त्वःतल ।

ज्वंपिंपासापिन्त त्वःतेगु ज्या जूसां संघर्ष समितिनाप गृहमन्त्रीजुं बचं ब्यूकथं प्रहरी बियातःगु मुद्दा लितकायेगुमजू । तारीखय् तक्कंका तयेगु यात । गुलिसित दां धरौटी कायेगुयात । लिपा ११२० कछलागाः ९ (२०५६ मंसिर१५) कुन्हु तातेकालिन प्रधानमन्त्री कृष्णप्रसाद भट्टराई व गृहमन्त्री पूर्णबहादुर खडकायात नापलानाः थुगु मुद्दा लितकायेगु माग समितियापाखे हानं न्ह्यब्वयेगु जूबले प्रधानमन्त्रीजुं सकारात्मक लिसः बियादीगु खः । अथेहे समितियापाखे थुगु भाषिक आन्दोलनया इवलय् १११९ तछलाथ्व १० (०५६ असार ९) कुन्हु लुमदिइ धर्ना बिसें सार्वजनिक याःगु संविधान संशोधन सम्बन्धी न्यागू मागयात नं न्ह्यब्वयेगु जुल । थुगु प्रतिनिधि मण्डलय् ब्वतिकयादीम्ह सांसद तीर्थराम डङ्गोलजुं थ्वहे इलय् थौकन्हय्या शिक्षाय् संस्कृतया अनिवार्ययात चीकेमाःगु

सः नं तयादीगु खः । प्रतिनिधि मण्डलपाखें न्ह्यब्वःगु सकतां मागयात कयाः
 भाःगु सहलह व्याकाः ज्यायायेया नितिं प्रधानमन्त्रीजुं अनहे दीम्ह गृहमन्त्रीजुयात
 भाला बियादीगु खःसां थ्व सम्बन्धय् सानियापाखे गृहमन्त्रीनाप तक्वः स्वापूतयाः
 नं थुखिपाखें आः तक छुंहे पलाः सरकारः खें ल्हवनामक्यन ।

थुम् भाषिक आन्दोलनय् थःत ज्वंकाः, कुंकाः नं अझं जाति भाषाया
 नितिं थःत पायेत व फ्यायेत न्ह्यचिलोच्चपिं सकलें झीगु नितिं हःपाः कथं खः।
 वयकःपिन थुगु भावनायात झीसँ नालेकथं यँया होटल हारतीस् १११९ कौलाथ्वः१
 (२०५६ असोज २२) कुन्हु छगू बचाःधंगु म्हसीका व हना ज्याइवः जूगु खता

अदालतयापाखें भाषा सम्बन्धि मुद्दाय् अन्तरिम आदेश बिसाचिसँ खास
 यानाः स्वनिगःया जनतायात सुसुचितयायेगु व भाषिक चेतना थनाः सतकय्
 ब्वकायेगुलि विशेष यानाः ज्वजलपा प्रा. लिया स्वनिगः सच्छि अले केएटीचया
 नेवाः इमेज व मेट्रो एफ. एम.या नेवाः ज्याइवःया भूमिका च्छायेबहः । झीगु
 भाय्या थौं कन्हय् पिदनाच्चंगु छगू जक न्हिपौ “सन्ध्या टाइम्स” थुगु आन्दोलनया
 ख्वाःपौथें जुयाः तिबः बियाव्याच्चंगु लुमके बहः । स्वनिगः बन्दयायेगु इवलय्
 यें महानगरपालिकाया नेवाः बडा अध्यक्षपिम्सँ माःगु आर्थिक तिबः बियाः अले
 माः कथं प्रचारया ज्याय् ब्वतिकयाः याःगु रवहालि अतिकं न्ह्यथनेबहः । नापं
 खुद्रा व्यापारी संघया पासापिं थःहे न्ह्यचिलाः बन्द तालाकेतं म्हिताक्यंगु
 भूमिका नं उतिकं लोमंके मफैगु षक्ष खः ।

स्वनिगः बन्दे भाषिक अधिकार प्राप्ति या इवलय् झीसँ न्ह्याकागु
 आन्दोलनया छपुल व झीगु सतक आन्दोलनया न्हापांगु पलाः जक खः । थ्व
 आन्दोलनया इवलय् झीसँ ल्हवनागु मागत मध्ये छताहे पूवंगु मनुनि । उलि
 जक मखु थुज्वःगु माग पूर्वकेगुपाखे सरकारयापाखें छतिहे नुगः बियाच्चंगु
 मनु । थौनं झीगु समस्या थाति लानाच्चंगु व झीगु अधिकार कुण्ठित जुयाच्चंगु
 सम्बन्धय् राज्यसतापाखें भचाहे संवेदनशिल जुयाः च्यूताः क्यंगु मनुनि । उकिं
 देया थौया परिस्थितिं संघर्षा नीतिं झीगु पलाः अझं क्वातुकेमानिगु, अझं
 तच्चयेक न्ह्याकेमानि धकाः न्वानाच्चंगु दु । थःगु जातिय , भाषिक समान
 अधिकार प्राप्तीया थ्व संघर्षय् स्वनिगः बन्दया इवलय् झीसँ ब्वयागु ज्वःमदुगु

एकतायात अन्न वधातुकाः आन्दोलनयात न्हू कथं व ताईतक न्ह्याकेत झीत
इत्तं इनाप यानाच्चंगु दु ।

११२० बछलाखः १

(२०५७ बैशाख २३)



अदालतपाखें ब्यागु अन्तरिम आदेश विरुद्धया जुलुसय् मयजुपि



'स्वतंत्रता: बन्द' छन्हु न्हयव पिदंगु मशाल जुलुस



स्वनिगः बन्दया इवल्य ज्वनाः कुपिनि हनाय् जूगु विशेण ज्याइवः



स्वनिगः बन्दया इवल्य ज्वनाः कुपिं भाषिक कार्यकर्तापिं



स्वर्णिमा: बन्दया छन्दु न्हय: पिह्वांगु विशाल मशाल जुलुस (न्हूसतक)